



*Minggu, 16 April 2023*  
**Ogen: Masmur 71:23**



**"Geluhku Rende Ersurak"**



**S**i endeken lagu i bas KEE No. 399, jenari si endeken ka lagu karo si judulna 'Bunga Rampe'. Tentu beda kal nanamna bas pusuh. *"Mari surak muji Tuhan, endesken nden-enden m'riah, o surga doni ersurak kerina. Mari rende muji IA, alu ukur si meriah, puji gelarNa si Badia. La 'rngadi-ngadi, ku puji Kam Tuhan, bas krina dampar kegeluhen. Ersurak m'riah, pusuhku i bas Kam. Terpuji Tuhan rasa lalap"* (KEE 399). *"Bicara ue ue nindu mbarenda turang morah ateku., entah labo bagenda, maba perdalan turang nanade gitingndu. Aku man bandu, bandu kal aku nindu turang morah ateku, tapi gundari itadingkenndu turang bre karнду..."* (lagu bunga rampe). Adina lagu KEE 399 si endeken reh semangatna kita tapi adina lagu bunga rampe si endeken reh gulutna ukurta. Adina lagu KEE 399 si endeken lupa kita nandangi persoalenta tapi adina lagu bunga rampe si endeken tambah soal si mbaru man banta.

Geluhku rende ersurak, enda me si jadi tema paksa tenengta wari enda. Arah tema enda ibabai me kita guna ngasup rende ersurak seh maka arah ende-enden si endeken kita banci mpeturah semangat ras pe keriahen ku pusuhta. Perlu kal si pilih lagu si jadi ende-endent teptep wari, gelah arah lagu si endeken e malem ateta janah kalak si megisa pe turah semangatna. Pemasmsur bas ndalani erbage-bage persoalen, megati ilakokenna rende dinggen ersurak. Pemasmur nggejapken maka ngasup ia ngelewati teptep persoalen erkiteken kuasa Tuhan, emaka nina pemasmur i bas masmur 71:23 *"Ersurak aku dem keriahen janahku ngendeken ende-enden pujin man baNdu. Geluhku rende ersurak, sabap enggo aku ipulahiNdu"*. Pemasmur tetap ngidah kuasa Tuhan sinjamini geluhna, emaka rende ersurak ia. Selaku anak-anak Dibata tetap kita rende ersurak.